



Faasnacht 2020

E Huus mit zwanzig Zimmer, Summerfeerie in Hawaii,
e S-U-V zum go boschte, e Indoorpool dehäi.
Denn uf New York go shoppe. Wäisch, nur e Trip, e churze.
Aber tschuld, dass d Gletscher schmelze, syge myni Chie, wo furze.

Bim Sutter Beck häi sy d Mäitlibäi Glücksbringer tauft.
S wird nid lang goh, bis me im Dezämber Grättimensche chaufft.
Damit mr käi Verchäufere e Strick wird chönne dräie,
bstell y, wenn dört e Zwätschge stoh, en Aprikoosewäie.

S Groosi goht nüm in d Chilche. Es macht jetz alles mit em Handy.
S het en App für s eewige Lääbe. Y hoff s nimmt käi bööses Ändi.
Y gseh s Groosi vor em Petrus stoh. S darf nid in Himmel goh.
S het dr Zeedel mit em Passwort am Chielschrank hange loo.

An däm Frauesträik do chöme die wohre Brobleem uf e Disch.
Hesch gwüsst, dass Mehrwärtstüür uf Tampon frauefindlig isch?
Es frogt my äin: Wo isch s Broblem, äimool pro Monat Mehrwärtstüür?
Ich zahl zwäi Stutz jeede Woche, vollkrass Mann, Sackgebühr.

Y tauft myni Dierli alli noch em änglische Köönigshoof.
Charles häisst my lahmi Änte. Harry häisst mys blinde Schoof.
S verrücktischt Huehn häisst Megan. E Prinz Andrew han y au.
Dä wird jetz aber umtauft. Wäisch, my Eeber isch käi Sau.

„Miir wänn kai Spidaal mit de Rammel, kai Brugg vom Calatrava.
Miir wän kai Ozeanium, suscht mache miir e Drama.“
Basel isch Provinz und blybt Provinz und wird s no soo lang blyybe,
bis me Fisch mit V und Gälterchinde wird mit CKDT schryybe.

Friener het d BaZ e Sinn ghaa, me läit se in d Chatzechische
oder schützt drmit dr Boode bim Voogelcheefig mischte.
Jetz git s das Cheesblatt digital: Hey Alte! Heschs begriffe?
Drum muess dys aarme Büüsi hüt diräkt ufs iPad schiffe.

Letscht Summer sy d Chälbli äinsaam, sy luege truurig dryy,
well ihri Mami ganz wyt fuurt uf dr Strooss am Sträike syy.
Au dr Muni isch nid umme, däa macht sich us em Staub.
Däa räist uf d Maledive in Vaterschaftsurlaub.

Dr Läppli isch wiider zrug, Basel fyrt sy Superstaar.
Är isch buureschlau, het Witz und Charme, är isch äifach wunderbar.
Sy Ehrlichkäit, sy Disziplin het äär us guetem Grund,
well dr Läppli halt, genau wien ych, us dr Wältstadt Buckte chunnt.

Dr Ueli Murer säit im wysse Huus: Hello Mister Trömp.
Ych bin en Buur vom Zürisee, my hart it makes a Gömp.
Ych han dyhäi en Gäissbock. He look s like you. Y am sorry, Sir.
Y think you and my Gäissbock, you have the same Coiffeur.

In dr Joggeli-Halle sääge sy: Die Rapper rappe nid!
Miir wän nid, dass es mit em Heiri e riise Theater git.
Dasch richtig soo! Dört rapp nur ych, y hoff scho glyy, nid z spoot.
Dört rapp ych für en FCB, wenn dr Koller ändlig goht.

Fridays for future find y super. Die Junge gönge uf d Strooss.
An de Wahle gwünne die Griene. Dr Frehner wird arbeitsloos.
D Natuur isch voll in Moode. Y darf my uf e Summer fröie,
wenn alli Griene, in de Flip-Flop, wäi miir cho hälfe höie.

Wäär findet, my Chalb würd stinke, däm säag y, das muess so syy.
Es isch e Biogaas-Reaktor, Mühlebärg isch lengscht verbyy.
Es wäiss, dass es do vooorne sächs Mol äin lo fahre sett.
Das längt für e volli Laadig vo eusem Elektrotrottinett.

D Maya Graf isch e Höhepunkt, wo fascht nüm hööcher goht:
E grieni Büürin us em Baselbiet isch jetz im Ständeroot.
D Eva Herzog chunnt vo Prattele, wäisch worum y daas betoon?
Dank deene zwäi isch s Baselbiet e richtige Vollkanton!

Y iss uf mym Buurehoof grundsätzlich regionaal.
S Fläisch us äigener Schlachtig, s Gmies us em Läimedaal.
Dä Corona-Virus blogt my glyych, es stinkt mr gopfergässe,
dass y d Chineesenuudle muess mit eme Mundschutz ässe.

Die Bäiz zum blutt go ässe macht nid uf, dasch denn e Mischt.
Wo aane gohsh jetz z Basel als hungrige Nudisch?
Nöime stöört dy Runzle-Ranze nid. Döört loot me dii in Rueh:
Hock doch äifach füüdleblut in die blindi Chue.

